

# KDNK \$920 bilion menjelang 2020

BH 27 MAR 1991

MALAYSIA dijangka mencatatkan Keluaran Dalam Negara Kasar (KDNK) \$920 bilion menjelang 2020 jika purata tahunan pertumbuhan ekonominya bagi tempoh 30 tahun dapat dikekalkan pada kadar tujuh peratus.

Perdana Menteri, Datuk Seri Dr Mahathir Mohamad, berkata berdasarkan matlamat realistik yang ditetapkan oleh kerajaan mulai tahun lalu, \$920 bilion itu adalah hampir lapan kali berbanding \$115 bilion pada 1990.

Katanya, matlamat itu mengambil kira pertumbuhan KDNK hampir dua kali ganda bagi tempoh setiap sepuluh tahun di antara 1990 dan 2020.

Dalam kertas kerja bertajuk *Peluang Bagi Malaysia Untuk Maju ke Depan* di persidangan pertama sehari, Majlis Perdagangan Malaysia (MPM) yang diedarkan di Kuala Lumpur, semalam, beliau berkata sasaran optimum itu boleh dicapai sekiranya

rakyat menetapkan wawasan yang tinggi untuk meningkat dan berusaha lebih bersungguh-sungguh.

MPM yang dilancarkan oleh Perdana Menteri yang juga pengerusinya, dilancarkan kelmarin. Ia disertai oleh 62 anggota termasuk Menteri Kabinet dan tokoh korporat tempatan.

Datuk Seri Dr Mahathir berkata, adalah perlu bagi semua pihak mengawal supaya pertumbuhan negara tidak menjejaskan kestabilan, kadar inflasi dan dapat meningkat serta membaiki mutu kehidupan dan pencapaian objektif sosial lain.

"Rakyat boleh mencapai matlamat itu walaupun ia sukar dan terpaksa melalui duri dan ranjau," katanya.

Perdana Menteri berkata pada tahun 1960-an, Malaysia mencatatkan pertumbuhan purata tahunan 5.1 peratus diikuti dengan 7.8 peratus pada dekad pertama Dasar Ekono-

mi Baru (DEB). Bagaimanapun angka itu merosot kepada 5.9 peratus apabila negara dilanda kemelesetan ekonomi pada tahun 1980-an.

Di segi perbandingan katanya, KDNK purata tahunan negara meningkat 6.3 peratus bagi tempoh 30 tahun lalu dan 6.9 peratus dalam tempoh 20 tahun lalu.

"Apa yang diperlukan ketika ini ialah pertambahan pertumbuhan 0.1 peratus untuk menjadikan tujuh peratus. Sekiranya kita berjaya berbuat demikian, Malaysia yang dijangka mencatatkan purata pertumbuhan penduduk tahunan 2.5 peratus menjelang 2020, rakyat Malaysia akan empat kali ganda lebih kaya berbanding 1990," katanya.

Beliau berkata, objektif ekonomi yang kedua utama ialah mewujudkan keadaan yang lebih bersaing, peka, dinamik dan anjal terhadap perkembangan jangka panjang.